

Tanṭan̄a tsghatá lwa 1 Piyer

Ga zgu

¹ I'i Piyer ghunatá mnda Yesu Kristi ta vinda na delewer na ṅa zabatá mnduha Lazglafta ta wutsatá vgha ta nzaku ka matbay ta hadika Puṅ nda Galat, nda Kapadus, nda Asiya, nda ya ta hadika Bitani*.

² Lazglafta ta nzakway ka Da ta zabaptá kaghuni manda va ya ghada tsi ta payafta. Ka faghutá tsi ta kaghuni ka ṅani nda ma Sulkumani nda ghuḅa, ṅa nzakwa ghuni ka gwal ta snanatá gwada Yesu Kristi, ṅa wutsikaghunaftá usani ka ghuḅighunista nda tsi. Ka vlaghunavla Lazglafta ta zdakatahudani nda zdakwani tani katakata.

Faftá ghəṅ ta mbaku

³ Zləzlvama Lazglafta ta nzakway ka Dani ma Mghama mu Yesu Kristi. Ma glakwa Zdakwani, ka yəglatá tsi ta amu ka vlamata hafu ka lfid ma sli'aganaptani ta Yesu Kristi mataba gwal nda rwa. Mantsaya tama, mamu mu nda fata ghəṅ ta nzaku nda hafu ka lfid,

⁴ ka kzla skwi ya kul ḅadzavata, kul ksə rdak, kul kdavakta, fana Lazglafta ta zwanani ta luwa.

⁵ Kaghuni, ka zlghafzlgħa kuni katsi, ta ngha kaghuni Lazglafta nda mbrakwani ṅa mbaghunafta. Tsa mbaku ya ná, ma kdavakta fitik dza'a sṅanṭa kuni.

* 1:1 Gray nda Yakubu 1:1.

6 Tsaya tama kəl kuni ka nzata nda rfu. Anj mndani, ndanana nda nra nɔdɔfa ghuni nja fitik kwitikw da skwiha kavghakavgha ta dzəghaghunata.

7 Tsa skwiha ta dzəgha kaghuni ya ná, nda nza nja marantá nzakwa zlg hay nda nɔdɔfa ghuni. Ta bɔdzaku na dasu mndani, ama ta famfa lu ma vu nja nghay ka vərđani tsi, ka ki tsi. Mantsaya nzakwani guli nda zlg hay nda nɔdɔfa ghuni ta malapta ka dasu ya. Mantsaya tama, nja klaghunaktá tsa zlg hay nda nɔdɔfa ghuni ya ta zləzlvu, nda glaku, nda sgit, bađu tsa fitik dza'a zlagapta Yesu Kristi ya.

8 Anj mndani, ta ngha† a kuni ta Yesu nda ira ghuni wa, ama đvudva kuni, zlg hafzlg ha kuni guli đər ta ngha a kuni. Tsaya ta kəl kuni ka rfu katakata kul mnavata nda wi,

9 kabga mutsafta ghuni ta mbaku ta nzakway ka klatá ghəŋa zlg hay nda nɔdɔfa ghuni ya.

10 Ghalya, zbanzba la anabi đina ta tvi ya ká Lazglafta dza'a mbanaftá mnduha, ka mnutá həŋ ta gwada ta ghəŋa tsa zdakatahudı payaghunaf Lazglafta ya.

11 Ka mnə Sulkuma Kristi, ta nzakway ma nɔdɔfa tanj ta gwada ta ghuya đanwa ya dza'a ghuyta Kristi, ma kdaku tsi mutsa glaku. Ka njavatá tsa anabiha ya ka psa snanja, ka yawu dza'a magakwa tsa skwi ya, nda ya ka kinawu kə'a dza'a magaku ya‡.

12 Ka snanamtá Lazglafta ta tsa la anabi ya kazlay: Ka nja tanj a tsa gwada ya wu, ka naghuni

† 1:8 Gray nda Yuhwana 20:29. ‡ 1:11 Ngha ta Zabura 22, Isaya 53, Lukwa 24:25-26.

nzakwani kə'a. Ndanana, mnaghunamna gwal ta mna Lfida Gwada ta tsa skwiha ya. Nda mbrakwa Sulkum nda ghuḅa ghunagata Lazglafta snaghu-namtá hən ta tsa gwada ya. Tsa gwada ya guli ná, kumanḵuma duhwalha Lazglafta ta snaḵta.

Nzaku ya ta ranḵta gwal zlgħay nda ḡuduf

¹³ Tsaya tama, payavawapaya ḡa ksa slna, nza-wanza nda fata ghən hzleḡa. Fafwa fa ta ndana ghuni ta zḡakatahuḡi ya dza'a vlaghunata lu baḡu zlagapta Yesu Kristi.

¹⁴ Ya nda nza kuni ka zwana Lazglafta ta snanatá gwadani ya, ma zlanəḡ kuni ta vgha ghuni ta ghwadaka skwiha, ya si ta zḡəgaghunata ghalya ma nzakwa ghuni ta kul snaḵtá Lfida Gwada.

¹⁵ Tsa Lazglafta ta hgaftá kaghuni ya, nda ghuḅa tsatsi. Nzawanza kaghuni guli nda ghuḅa manda va tsatsi.

¹⁶ Ka lu vindafta ma deftera Lazglafta na: «Nza-wanza nda ghuḅa, kabga nda ghuḅaḶ i'i,» ka'a.

¹⁷ Ka ta hḡay kuni ma du'a ghuni ka «Da» ta Lazglafta, ya ta tsa guma ta ghəḡa inda mndu taḡta slnani maga tsi kul gala mndu nda gala ya, nzawanza nda zləḡay ma na nzakwa ghuni tata na ghəḡa haḡik na.

¹⁸ Nda sna kuni kazlay, varagap ma nzaku ka rgha, zlaghunəḡ dzidza ghuni lu ta kaghuni kə'a. Nda dasu nda ya nda dzindar ta ḡadzaku ya a varata lu ta kaghuni wu,

Ḷ 1:16 Livitik 19:2.

19 ama nda usa Kristi* ta bluta varata lu ta kaghuni. Manda zwanja tuwak kul had maslvinza, kul had rdak tida ya, na tsa Kristi ya.

20 Lazglafta ta thanafta mantsaya daga ma kdaku lu zlaganaptá ghəŋa hadik, ka marigintá tsi ma na kdavakta fitik na, ŋa kata kaghuni.

21 Nda ma tsatsi zlghafta kuni ta Lazglafta ya ta sli'aganapta ma mtaku mataba gwal nda rwa, ka vlantá glaku. Tsaya kəl kuni ka zlghafta, ka faftá ghəŋa ghuni ta Lazglafta.

22 Nda nza kuni ka gwal nda ghuḅa, ma snanata ghuni ta gwada Lazglafta, ŋa dvuta ghuni ta zwanama ghuni nda ŋudufa ghuni. Gdawagda tama ta dvuvustá vgha ghuni kahwathwata nda ŋuduf turtuk.

23 Mantsa ya tama ná, nda sna kuni kazlay: Nda ya yakwa mahisa ghuni nda mbrakwa gwada Lazglafta ya ta vla hafu ta nzaku ŋa kdekedzen kə'a. Lazglafta ya kul had ta mtavata ta vlaghunanatá tsa hafu ya, ya ta mtaku a wa.

24 Ka lu vindafta ma deftera Lazglafta na:

«Inda mnda səla ná, manda kuzunŋ nzakwani.

Sgitani guli ná, manda vzlizla kuzunŋ nzakwani guli.

25 Ama gwada Lazglafta ná, ŋa kdekedzen† nzakwani,» ka'a.

Tsa gwada ya ná, tsaya Lfida Gwada ya mnaghuna lu.

* **1:19** Ngha ta Kwalasuha 1:20. † **1:25** Aya 24-25: Isaya 40:6-8, mnaf lu manda ya nda Grek ŋa ghalya.

2

¹ Hliŋwahla ta inda ghwadaka skwiha ma ŋudufa ghuni, ma kuslember kuni ta kuslemberaku, ma pghə kuni ta wirak his ma vu, ma hara'u kuni ta hara'uwaku, ma tsanava kuni ta skwi ta mndu guli.

² Manda zwanja vzi'uwa ta mama u'a da mani ya, mantsaya ka kaghuni guli mama vərda gwada Lazglafta ŋa glay ghuni ta glaku nda tsi, ŋa mutsay ghuni ta mbaku ŋa dekdek.

³ «Lawa ta kəma ta kəma, kabga tapanatapa kuni ta zdakwa* Mgham Yesu Kristi.»

⁴ Gavanavawagava ta Mgham Yesu Kristi. Tsatsi tsa pala ta vla hafu wudidiŋ mnduha ya. Tsatsi zbap Lazglafta ta hemanata inda skwi ta wa irani.

⁵ Kaghuni guli, nzawanza ka pala nda hafu mida, ya ta kəl lu ka ba həga mndərga ŋa Sulkum, ŋa nzakwa ghuni ka guyata ghəŋa gwal nda ghuḅa ta vla skwi manda ya ta kumə Sulkum. Tsaya skwi ta zdəganatá Lazglafta nda ma Yesu Kristi.

⁶ Ka lu vindafta ma deftera Lazglafta na:
«Wana zbapzba yu ta vərda palaka tughwa ba həga, ka fata ma luwa Siyuna. Mndu ya ta faftá ghəŋani tida ná,
had sana skwi dza'a pghanaghatá hula dekdek wu,» ka'a.

⁷ Ka ŋa kaghuni gwal ta zlghafta ya ná, dagala sgitani, ama mantsaya a da gwal kul zlghafta wa. Ka lu vindafta ma deftera Lazglafta na:
«Va tsa pala wudidiŋ gwal ba həga ya, ta nuta ka vərđaka pala tughwa həga.»

* **2:3** Ngha ta Zabura 34:9.

8 Ka lu vindafta guli na:

«Tsa pala ya ná, ta dza mndu ka tuthun.

Tsa pala ya ta zlambanaptá† mnduha,» ka'a.

Ta dzay ta həŋ ka tuthun, kabga kwalaghuta taŋ ta snanató gwada Lazglafta. Manda tsaya thanafta Lazglafta ta həŋ daga manda ghalya.

9 Ama kaghuni ya, nda nza kaghuni ka mndəra mndu zabap Lazglafta, ka guyata ghəŋa gwal ta vla skwi ŋa Lazglafta, ka gwal faghu Lazglafta ka ŋani. Tsatsi ta hagaftá kaghuni ka hlagaghunapta ma grusl, ka pghaghunamta ma tsuwadak ta ndərmim lu nda ndərmima, ŋa mna skwi maga tsi ta malaghutá mbraku‡.

10 Ghalya ná, si nza a kuni ka mnduha Lazglafta wu, ama ndanana, nda nza kuni ka ŋani. Ghalya mutsaf a kuni ta tawa hidahidá Lazglafta wu, ama ndanana, mutsafmutsa§ kuni.

Nzawanza ta nzaku ka mnduha Lazglafta

11 Zwanama da gwal ta dvu yu nda ndufu da, dina ka snanta ghuni kazlay, manda matbay nza-kwa ghuni, gdavata a kuni ma na ghəŋa hadik na wu kə'a. Tsaya ta kəl yu ka vla mbraku ŋa ghuni, ka wara kuni ta skwi ya ta hara'uwa kaghuni. Ya hafa ghuni ta zbə tsa skwiha ya.

12 Dina ka kuni nzaku mataba gwal kul snantá Lazglafta. Ŋa nzakwani dər má ta vaza rutsak həŋ ta kaghuni, ŋa nghay taŋ ta nərma slna ya ta magə

† **2:8** Aya 6: Ngha ta Isaya 28:16. Aya 7: Ngha ta Zabura 118:22. Aya 8: Ngha ta Isaya 8:14. ‡ **2:9** Ngha ta Sabi 19:5-6, Isaya 43:20, Sabi 19:5, Vrafta ta Zlahu 4:20, 7:6, Isaya 43:21, 9:1. § **2:10** Huseya 1:6, 9, 2:1, 23, 25.

kuni, ɲa zləzlvay taŋ ta Lazglafta bađu dza'a sagha tsi da guyaku nda həŋ.

¹³ Ma tsa nzakwa ghuni ka ɲa Yesu Kristi ya, hanaganawahana ta ghəŋa ghuni mista inda gwal ta ga mgham ta ghəŋa mnduha. Haniŋwa ghəŋ mista mgham dagala, ta ga mgham ta ghəŋa inda skwi.

¹⁴ Haniŋwa ghəŋa ghuni mista ɲumna ya fa lu ɲa tsanaghatá guma ta gwal ta maga ghwadaka skwi, nda ya ɲa ghuba gwal maga skwi dīna*.

¹⁵ Kumaŋkuma Lazglafta ta magay ghuni ta skwi dīna, ɲa hanaftá wi ta gwal kul snantá skwi, ta gutá rgha taŋ.

¹⁶ Nzawanza ka gwal fala'u vgha taŋ. Nziya nza tsi ná, ma nza tsa fala'uwata vgha ghuni ya, ka skwi ɲa bukwanatá ghwadaka skwi. Ama nza-wanza ta nzaku ya ta marantá nzakwa ghuni ka gwal ta ksanatá slna ta Lazglafta.

¹⁷ Vlawavla ta glaku ɲa inda mndu, d̄vuwad̄va ta zwanama ghuni ma zlḡhay nda ɲuduf, zləŋawazləŋa ta Lazglafta, vlawavla ta glaku ɲa Mgham dagala.

Klawa sada Kristi

¹⁸ Kaghuni la kwalva, hanaganawa ghəŋa ghuni mista danahəga ghuni, ka zləŋa kuni ta həŋ kah-wathwata. Mista gwal zda ghəŋa taŋ nda gwal leštekw̄a yeya a wu, ama nduk nda ya mista gwal təŋtəŋa nzakwa taŋ tani.

¹⁹ Ka lagha mndu ka su'a ghuya danwa, ta ghəŋa kumayni ta nzaku manda ya ta zdəganatá

* **2:14** Aya 13-14: Ngha ta Ruma 13:1-7.

Lazglafta, dər má si ra a ghuyayni ta tsa dāŋwa ya wu katsi ná, skwi dīna ya.

²⁰ Ka lagha ghuni ka gatá gwada, ka ghuyə lu ta dāŋwa ŋa ghuni ta ghəŋani, ka su'aftá kuni katsi, mamu mndu dza'a ghuba kaghuni ra? Ama ka lagha ghuni ka magatá skwi dīna, ka ghuyə lu ta dāŋwa ŋa ghuni ta ghəŋani, ka su'aftá kuni katsi, skwi dīna tsaya da Lazglafta.

²¹ Ka ŋa tsaya hgafta lu ta kaghuni, kabga ghuyghuya Yesu Kristi ta dāŋwa guli ta ghəŋa kaghuni. Tvi ya taghunap tsi ŋa ksay ghuni guli ta səlani.

²² Tsatsi ná, walaŋ a ta gatá dmaku wu, had sana tsakalawi ta sabi ma wani[†] wa.

²³ Ma fitika razay mnduha, vranam a ta həŋ nda razu wa. Ma fitika ghuyay lu ta dāŋwa ŋani, tha a kazlay: Nya', kabgawu na kə'a wa. Ka zlanantá tsi ta ghəŋani ta Lazglafta ya ta tsa guma nda tvani ya.

²⁴ Tsatsi ka ghəŋani ta klaftá dmakwa mu ta vghani ma zləŋafta lu ta udza zləŋay. Ŋa nzakwa mu ka gwal nda rwa tvə dmaku, ŋa nzay mu ta nzakwa tdukwa. Nda ma tsa balanata ya mbaghu-nafta lu.

²⁵ Ghalya si nda nza kuni manda tuwakha nda zada[‡], ama ndanana tama, vrakvra kuni da mnda ngha tuwak ta nghapta ka hafa ghuni guli.

3

Nzakwa i marakw nda zə'al

¹ Kaghuni guli mi'aha, haniŋwahana ta ghəŋ mista zə'alha* ghuni. Ka ta magay kuni mantsa,

[†] **2:22** Ngha ta Isaya 53:9. [‡] **2:25** Aya 24-25: Ta gray lu nda Isaya 53:4-6. ^{*} **3:1** Ngha ta Afisus 5:22, Kwalasuha 3:18.

dər má sna a sanlaha ta gwada wu, ɲa nɲhay taɲ ta ɲərma nzakwa mi'a taɲ, ɲa mbəɗanafta taɲ ta nzakwa taɲ, dər má pslaf a kuni ta wi.

² Dza'a nɲhaɲnɲha həɲ ta ɲərmata nzakwa ghuni, nda ya ká kuni ta sna gwada da həɲ.

³ Yaha rka ghuni da nzakway ka skwa nɲhay wa iri, manda: Datá ghəɲ ya nda bla, nda ya nda mizidikwa dasu, nda ya nda lgut nda bla nda bla† dzvani.

⁴ Ka nza rkatarka ghuni ka skwi nda dīfa ma ɲudufa ghuni, ka nzakwa tsi ka rka ya kul had ta ɓadzavata, manda: Nzaku leɓtekwa, tɓekwa. Tsahaya skwi dagala sgitani da Lazglafta.

⁵ Ghalya, mantsaya si ta rka mi'aha ta fafta ghəɲ ta Lazglafta ta rka, ma haniɲta taɲ ta ghəɲa taɲ mista zə'alha taɲ.

⁶ Mantsaya si ta maga Sara, ta sna gwada da Abraham. «Mghama dá‡!» ka'a si ta hɲay guli. Kaghuni guli ná, kwaghani kuni, ka ta magay kuni ta skwi dīna, ka ksu a zləɲ ta kaghuni.

⁷ Kaghuni zə'alha guli, dīna ka kuni nzaku nda mi'a ghuni, ka famta kuni ta dīfil ma ghəɲ, ya gwal nda hta mbrakwa taɲ hahəɲ. Ka vla kuni ta sgit§ ɲa taɲ, kabga tsa hafu ya ta vlə Lazglafta ka zdakatahudani ya ná, nda hahəɲ tani, nda kaghuni tani mida. Ka mantsaya ka kuni magay na: Ta snay Lazglafta ta du'a ghuni.

Ghuya danwa ta ghəɲa maga skwi dīna

⁸ Ɗa kdīɲta ná, guyawa guya ta ndana ghuni kaskwa turtuk, tawavuswa hidahida, dɓuvuswa

† 3:3 Nɲha ta 1 Timute. 2:9. ‡ 3:6 Nɲha ta Zrafta 18:12. § 3:7 Nɲha ta Afisus 5:25, Kwalasuha 3:19.

vgha ghuni ka zwanama nda kwaghama, magawa zdaku nzawanza nda hanatá ghəŋ.

⁹ Ka magamaga mndu ta ghwadaka skwi, ma vranam ka nda ghwadaka skwi. Ka razaghaf raza mndu, ma vranam ka nda razu, «katək na tfanaghatfa ta wi*,» kabga ŋa tsaya hgafta Lazglafta ta kaghuni, ŋa tfaghunaghatani ta wi ta kaghuni guli.

¹⁰ Ka lu vindafta ma deftera Lazglafta na: «Ka ta kumay mndu ta zdakwa nzakwani, ka ta kumay mndu ta rfayni ta rfu ma nzakwani, ksanatani ta ghanikani, zlanṭani ta tsakalawi.

¹¹ Zlanṭani ta maga ghwadaka skwi, ka maga skwi dīna.

Zbayni ta zdaku ka ŋavata mistani.

¹² Nda fa ira Lazglafta ta gwal ta maga skwi tdukwa.

Nda fa sləmənani ka sna du'a taŋ.

Ama gwal ta maga ghwadaka skwi ná, ta mbədanambəda Lazglafta ta hul ta həŋ†,» ka'a.

¹³ Ka ŋavaŋa kuni ka maga skwi dīna ná, wati ma mndu ya dza'a maga ghwadaka skwi ŋa ghuni na?

¹⁴ Aŋ mndani dər má ta ghuyay kuni ta daŋwa ta ghəŋa vəl magay ghuni ta skwi tdukwa ná, dza'a rfay kuni ta rfu. Ma zləŋ kuni ta gwal ta kuma magaghunatá ghwadaka skwi. Ma tdu tsi ta ŋudufa ghuni.

¹⁵ Fafwafa ta ghəŋa ghuni ta Yesu Kristi turtukwani, ka ga tsi ta mgham‡ ma ŋudufa ghuni. Fata kaghuni ta ghəŋa ghuni ŋa ghuni ŋa zlghawi

* **3:9** Ngha ta Mata 5:44. † **3:12** Aya 10-12: Ngha ta Zabura 34:13-17. ‡ **3:15** Ngha ta Mata 5:10, aya 14-15: ngha ta Isaya 8:12-13.

da inda gwal ta dawaghunata ka kabgawu kəl kaghuni ka faftá ghəŋa ghuni ta Yesu Kristi.

¹⁶ Ta zlgħə kuni ta tsa wi ya, zlgħawazlgħa nda hanatá ghəŋ, nda ya nda vla glaku ŋa taŋ guli. Gəɗata kaghuni ta maga tsa skwi dina ya ŋaghuni, kada ksuta tsi ka hula ta həŋ, dər klafkla həŋ ta kaghuni ka ghwadaka mnduha, ka raraza ŋərmata nzakwa ghuni ta tva Kristi.

¹⁷ Ta draŋ ghuya daŋwa ta ghəŋa maga skwi dina, ka si mantsaya kumaŋta Lazglafta, ka ghuyay ta ghəŋa magatá ghwadaka skwi.

¹⁸ Mantsaya luta tsi guli nda Yesu Kristi, tsatsi ta nzakway ka tdukwa mndu, ka mtutá tsi turtuktuk ta ghəŋa ghwadaka mnduha, ŋa ɓhadamaghata da Lazglafta. Ma nzakwani ma slu'uvgha dzata lu, ka nzaku tsi nda hafu ma SulkumŠ.

¹⁹ Nda mbra tsa Sulkum ya. Ka laha tsi da mna gwada Lazglafta ŋa sulkumha tsam lu ma gamak.

²⁰ Tsa sulkumha ya ná, hahəŋ gwal ta kwalaghutá snanatá gwada Lazglafta ghalya. Aŋ mndani, nzdavanzda Lazglafta ka ksanatá ŋudufani ma fitika tsay Nuhu ta kwambalu. Ka mba'atá mbsaka mnduha hutsekw ma tsa imi* ya nda ma tsa kwambalu ya. Tghas yeya həŋ kwenkwen.

²¹ Tsa imi ya ná, gray nda batem ta mba kaghuni gitana ya. Rdak ta vgha a ta ghuɓu na batem wa. Magaftá batem ná, vlaŋta mu ta ghəŋa mu ta Lazglafta nda vərda ŋudufa mu ya. Ndana guli, ta mbay batem ta kaghuni nda ma sli'agapta Yesu Kristi ma mtaku.

Š 3:18 Ngha ta Ruma 1:4. * 3:20 Ngha ta Zlrafta 6:1–7:24.

²² Vraghuvra Yesu Kristi ta luwa, ta nzaku nda ga zeghwa Lazglafta, ta ga mgham ta ghəŋa duhwalha Lazglafta, nda inda sanlaha ma skwiha nda mbra nda mbra.

4

Maga skwi ya ta zdəganatá Lazglafta

¹ Nda sna mu kazlay: Ghuyghuya Kristi ta đanwa ma slu'uvgha kə'a. Kaghuni guli, nzawanza nda fata vgha ŋa ghuyay manda ŋani. Mndu ta ghuytá đanwa ma slu'uvgha ná, had ta gəgəltá dmaku wa.

² Ma na pdakwa fitik ŋa zay ghuni nda hafu ta na ghəŋa hadik na ná, nzawanza ta nzaku manda ya ta zdəganatá Lazglafta, manda ya ta hara'u slu'uvgha ya a wa.

³ Ma nzakwagapta ghuni manda ghalya ná, mburapmbura kuni ma maga skwi ta zdəganatá gwal kul snantá Lazglafta. Ma magay ghuni ta sli'insli'in, nda hara'u ta iri, nda ghuyaku, nda zdakwa skwi katakata, nda sasaku, nda manzakdawaya skwa wuyayha.

⁴ Ndanana tama, ta ndərmim nda ndərmima gwal kul snantá Lazglafta ta kwalaghuta ghuni ta gugəltá ghəŋ nda həŋ ma tsa nzakwa sli'insli'in ya, ka razu həŋ ta kaghuni.

⁵ Ama hahəŋ nda wa tan dza'a mnanatá slna tan ta kəma Lazglafta ya nda fa vghani ŋa tsanaghatá guma ta gwal nda hafu nda gwal nda rwa tani.

⁶ Tsaya kəl lu ka mnanatá Lfida Gwada ta dər gwal nda rwa, ŋa nzakwa tan nda hafu manda ya ta kumə Lazglafta nda ma Sulkum dər má tsanaghatasa Lazglafta ta guma ta həŋ ma ghəŋa hadik, manda va ŋa hamata mnda səla.

Nzaku ma guyatá ghəŋ

⁷ Ndusakndusa kdávakta fitika inda skwi. Nzawanza hzleŋa nda dífil ma ghəŋ, ɲa ɲavata ghuni ma maga du'a.

⁸ Mali ma inda skwi ná, tsaya gdávata ghuni nda dɔvuvustá vgha nda ɲuduf turtuk sani nda sani, kabga ta tiŋway dɔvu ta mndu ɲa plinistá ndəghata dmakwa* mnduha.

⁹ Ma rurunwaku kuni ta rurunwaku ta tsu'a matbay ta lagha da kaghuni.

¹⁰ Inda kaghuni, magawamaga ta slna nda tvani ɲa sanlaha nda skwi ya vlaghuna Lazglafta. Mantsaya dza'a kəl kuni ka nzakway ka vərda gwal ta ksa slna nda zdakatahudi kavghakavgha ya ta vlə Lazglafta.

¹¹ Ka vlanɣla Lazglafta ta mbrakwa gwada ta mndu katsi, ka mna tsi ta skwi mnana Lazglafta. Mndu ya vlanɣ Lazglafta ta mbrakwa maganata† slna ta mndu guli, ka maga tsi nda mbraku ya vlanɣ Lazglafta. Magawamaga mantsaya ɲa zləzlvay mnduha ta Lazglafta ma inda skwi, kabga Yesu Kristi. ɲani glaku, nda mbraku, ɲa kdəkedzenɣ. Amin!

Ghuya danwa nzaku ka mnda Kristi

¹² Zwanama da gwal ta dɔvu yu, yaha kuni da ndərmima ghuya danwaha ya ta fwaghunata da nzaku tsi ka skwa madukwa da kaghuni.

¹³ Rfawarfa ta rfu katək, nda nzakwa ghuni kawadaga nda Kristi ma ghuya danwa, kada

* **4:8** Ngha ta Mahdihdi 10:12, Yakubu 5:20. † **4:11** Ngha ta Slna gwal ghunay 6:2-4, Ruma 12:7.

ndəghafta ɲudufa ghuni nda rfu baɖu dza'a maraŋta tsi ta glakwani ɲa inda mndu.

¹⁴ Ka ta razay mnduha ta kaghuni, ta ghəŋa nzakwa ghuni ka ɲa Kristi katsi, rfawarfa ta rfu kabga ta nzaku Sulkum ya dagala ta nzakway ka Sulkuma Lazglafta ta ghəŋa kaghuni.

¹⁵ Ka ta ghuyay sani mataba ghuni ta ɗaŋwa katsi, ma nza tsi, kabga vəl dzatani ta mndu, kabga ghalatani ta ghali, kabga vəl magatani ta ghwadaka skwi, kabga vəl valamtani da skwi kul nghanata.

¹⁶ Ala, ka lagha mndu ka ghuya ɗaŋwa, kabga vəl nzakwani ka krista katsi, yaha tsaya da ksay ka skwa hula. Katak na, ka rfa tsi ta Lazglafta ta ghəŋa vəl favatani ta tsa hgu ya.

¹⁷ Saghasa fitik ɲa zraftá Lazglafta ta tsa guma. Tiŋəl ta ghəŋa həgani dza'a zrafta tsi ta tsay. Ala, ka si nda amu ka lu zrafta katsi, kinawu dza'a kdavakta tsi ta ghəŋa gwal kul snatá Lfida Gwada Lazglafta na?

¹⁸ Ka lu vindafta ma deftera Lazglafta na:

«Ka nda ɗaŋwa mbafta mndu tɖukwa katsi, kinawu dza'a kdavakta ɲa ghwadaka mnduha, nda gwal ta ga dmaku‡ na?» ka'a.

¹⁹ Tsaya tama, gwal ta ghuya ɗaŋwa manda ya ta kumə Lazglafta ya, ka gɗata həŋ ta maga skwi ɗina. Ka fanamta həŋ ta ghəŋa taŋ ma dzvu ta Lazglafta ya ta magaftá həŋ, kul haɗ ta mbəɗanaftá skwi mna tsi ya.

‡ 4:18 Ngha ta Mahdihi 11:31, Irmiya 25:29.

5

¹ Ndanana tama, wya ka yu ta mnanatá la galata mndu ta ngha Igliz mataba ghuni. I'i guli ná, glata mndu yu manda va hahəŋ. Masləmtsəka ghuya ta daŋwa ghuyə Kristi yu, dza'a mutsay i'i guli ta mayaka da ma glakwa Kristi ya dza'a maraŋta Lazglafta.

² Wyawa dzvu, ka ngha kuni ta bra ya faghu-nam* Lazglafta ma dzvu. Nghawangha nda ŋuduf turtuk manda ya ta kumə Lazglafta. Ma nza tsi ka mbla kaghuni nda mbla. Ma magə kuni kabga ŋa mutsa tsemi, ama magawamaga kabga dvu.

³ Ma zbə kuni ta ga má mghammgham ta ghəŋa gwal pghaghunam Lazglafta ma dzvu. Nzawanza ka gwal ŋa ksay taŋ ta sada ghuni.

⁴ Ka mantsaya ka kuni magay, bađu zlagagaghata mghama gwal ta ngha rini ná, ŋa mutsay ghuni ta zewzewa nda sgit tida, kul badzavata ya.

⁵ Kaghuni guli duhwalha, hanaganawa ghəŋ mista la galata mndu ta ngha Igliz. Kaghuni demdem nzawanza nda hanatá ghəŋ ma gwaya vgha ghuni, kabga «zdəgana a gwal ta gla ghəŋ ta Lazglafta wu, ama ta zdanaŋ zda ta hudi ta gwal ta hanaganatá† ghəŋ.»

⁶ Hanaganawa ghəŋ mista mbrakwa Lazglafta, kada kapaghunafta tsi ma fitik ya kumaŋ‡ tsi.

⁷ Pəghanamwa pgha ma dzvu ta inda daŋwa ghuni, kabga tsatsi ta nghapta ka kaghuni§.

* **5:2** Ngha ta Yuhwana 21:15-17, Slna gwal ghunay 20:28. † **5:5** Ngha ta Mahdihdi 3:34. ‡ **5:6** Ngha ta Mata 23:12, Lukwa 14:11, 18:14. § **5:7** Ngha ta Zabura 55:23.

⁸ Nzawanza hzlenja nda difil, kabga ta pgha budukwa ghuma ghuni halaway manda rveri ta hurgu ta zba skwi na dughwadutani. ⁹ Dihavawa diha ma zlghay nda nduf, ma zlanaj kuni ta tvi. Nda sna kuni kazlay: Mnderga va tsa danwa ya na, slanaghasla ta inda zwanama ghuni ta ghena hadik demdem ka'a.

¹⁰ Tahula ghuyta ghuni ta danwa ma fitik kwitikw ya, dza'a vlaghunavla Lazglafta ya ta gdata ta vla zdakatahudi, ta hgafta kaghuni ma Yesu Kristi, na lami da glakwani ya na kdedezen, na payafta tsatsi kaghani ta kaghuni, na diaghunatani, na mbraghunaftani, na kwala skwi kul gigidantá kaghuni.

¹¹ Nani mbraku na kdedezen. Amin!

Ga zgu

¹² Silven ta katihata kel yu ka vindaghunafta na zwanja delewer na. Nda sna yu kazlay: Nerma mndu ya ka'a* ta tva Lazglafta. Na vlaghunata mbraku kel yu ka vindaghunafta. Nda ya na graghunafta kahwathwata zdakatahuda Lazglafta. Dihavawa diha nda mbraku ta tsa zdakatahuda Lazglafta ya.

¹³ Ta ga zgu Igliz ma Babila na ghuni, gwal dagap Lazglafta manda va kaghuni guli. Ta ga zgu zwanja† da Markus guli na ghuni.

¹⁴ Guvuswa ga ta zgu sani nda sani nda brusa vgha hmætæt.

* **5:12** Silas: Ngha ta Sna gwal ghunay 15:22, 40. † **5:13** Babila: Ngha ta Suna Yuhwana 17:5, Sna gwal ghunay 12:12, 25, 13:13, 15:37-39, Kwalasuha 4:10, Filipiya. 24. Zwanja da: Ma sulkum (ngha ta 1 Timute. 1:2.).

Ka nza zɗakatahuda Lazglafta nda kaghuni demdem, kaghuni gwal ma Kristi ya.

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

f257b780-c0dd-5cce-9b20-430484439898